



**«ԻՆՏԵՐԱԿՏԻՎ ԿՐԹՈՒԹՅԱՆ  
ԶԱՐԳԱՑՈՒՄ»  
ՀԻՄՆԱԴՐԱՄ**



**ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ  
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ  
ԴԱՍԸՆԹԱՑ 2022**

**ՀԵՏԱԶՈՏԱԿԱՆ ԱՇԽԱՏԱՆՔ**

**ԹԵՄԱ**

**«Հայդուկային շարժում» թեմայի ուսումնասիրության  
գործընթացի կազմակերպման և պլանավորման  
առանձնահատկություններն 8-րդ դասարանում**

**ԱՌԱՐԿԱ**

**Հայոց պատմություն**

**ՀԵՂԻՆԱԿ**

**Ազգանուշ Երզնկյան**

**ՄԱՐԶ**

**Լոռի**

**ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆ**

**Ալավերդու Մ. Թանդիլյանի անվան թիվ 10  
հիմն. դպրոց**

**ՂԵԿԱՎԱՐ**

**Գագիկ Էմինյան**

## ԲՈՎԱՆԴԱԿՈՒԹՅՈՒՆ

Ներածություն	3
«Հայդուկային շարժումը» թեմայի ուսուցման կարևորությունը	6
Դաշտենցի «Ռանչպարների կանչը» «Հայդուկային պայքարը» թեման ուսումնասիրելիս	8
«Հայդուկային շարժումը» թեմայով դասի օրինակ	9
Եզրակացություն	17
Օգտագործված գրականության ցանկ	18

## Ներածություն

Երբ մի ժողովուրդ իր նվիրական իդեալը կապում է մի անձի ճակատագրին, ապա պատմությունը դադարում է, և սկսում է լեգենդների խորհրդավոր և ոսկե շարանը:

*Ավետիս Ահարոնյան*

ԽՍՀՄ-ի փլուզումից հետո մեր դպրոցն ունենցել է անչափ կարևոր և բարդ առաքելություն՝ կրթել ապագա քաղաքացուն՝ հայրենասեր ու հայրենատեր, մարդասեր ու բարոյական բարձր արժեքներ ունեցող անհատին, ազգային արժեհամակարգը պահպանողին ու ստեղծողին:

Ֆրանսիացի փիլիսոփա Դենի Դիդրոն ասում էր. «Կրթությունը մարդուն տալիս է արժանապատվություն, և նույնիսկ ստրուկն է սկսում գիտակցել, որ ինքը ծնված չէ ստրկության համար»: Օրվա հրամայականն է հայ մարդու, առաջին հերթին սովորողի մեջ սերմանել արժանապատվության և ստրուկ չլինելու գաղափարը: Բայց ինչպե՞ս դա անել, երբ շատ հաճախ դասագիրքը սովորողի մոտ ասոցացվում է որպես ավելորդ ու անպետք, դժվար մարսվող բառերի ու տերմինների կույտ: Կարծես՝ դարերով սեփական պատմությունն ու լեզուն ինչպես հարկն է սովորելու հնարավորություն չունեցած ժողովուրդը փորձում է դարերի բացը լրացնել ամբողջն այս սերնդից պահանջելով:

**Հետազոտության արդիականությունը.** Վերջին տարիներին շատ ենք խոսում այն մասին, որ սովորողին դժվար է ներգրավել դասապրոցեսի մեջ, հետաքրքրություն առաջացնել առ դպրոցը և ուսուցանվող առարկաները: Սովորողի պատասխանն էլ միշտ կապված է դասագրքի բարդ ու անհասկանալի լինելու, հանձնարարությունների շատ լինելու, ուսուցչի անիրականանալի պահանջների հետ:

Այս ամենը հաշվի առնելով կարևոր է պատմության (և ոչ միայն) դասը հնարավորինս հասկանալի, արդիական ու հետաքրքիր դարձնելը: Հակառակ դեպքում սովորողը կձանձրանա պատմական հեռուների մասին պարբերաբար լսելուց և իր համար եզրահանգումներ չի կատարի: Կարևոր է սերմանել այն գաղափարը, որ «Պատմություն» առարկայի հիմքում պատմելը չի ընկած, այլ պատմական տարբեր

Ժամանակահատվածներում տեղի ունեցած դեպքերն ուսումնասիրելն ու դրանց վերաբերյալ եզրահանգումներ կատարելը:

1. Պատմությունը միայն անցյալի մասին գիտելիք չէ:

2. Այն տարբեր ժողովուրդների փորձը, ու ձեռքբերումներն ուսումնասիրող գիտություն է:

3. Պատմության վերաբերյալ գիտելիք ձեռք բերելու ճանապարհին շատ կարևոր է ուսումնասիրել դեպքերի պատճառներն ու հետևանքները:

*«Որպեսզի սովորողները պատմական մտածողություն ձևավորեն և ոչ թե միայն դրա որոշ հատվածներ յուրացնեն, պետք է խրախուսել նրանց ամբողջական պատմական մտածողություն կիրառել: Եթե իսկապես ուզում ենք սովորողների մտածողությունը զարգացնել, ապա պետք է ուսումնառության այնպիսի փորձառություններ ստեղծենք, որ նրանք մտածեն սեփական մտածողության մասին: Սովորողների պատմական մտածողությունը կզարգանա, եթե նրանց հանձնարարենք մտածել պատմության մասին՝ որպես իմացության ձևի: Կարևոր է, որ սովորողը մտածի այսպիսի հարցերի շուրջ.*

- Կարո՞ղ ենք անցյալից սովորել:
- Կարո՞ղ է պատմությունը մեզ ասել, թե ով ենք մենք:
- Ի՞նչ է ժամանակահատվածը, իրադարձությունը:
- Ինչո՞ւ են իրադարձությունները տեղի ունենում:
- Արդյո՞ք կարևոր է, թե ով է իրադարձությունները դիտարկողը:
- Արդյո՞ք պետք է անցյալի գործողությունների մասին դատել ըստ ժամանանակից ստանդարտների»: [2; 28-29]

Կարևոր է պատմության դասին ուսումնասիրած յուրաքանչյուր թեմա արդիականացնել և այն դիտարկել մեր օրերում տեղի ունեցող դեպքերի ու իրադարձությունների համատեքստում:

### **Հետազոտության նպատակը.**

- 8-րդ դասարանի «Հայոց պատմություն» առարկայի «Հայդուկային շարժում» դասի կոնկրետ օրինակով ցույց տալ, թե ինչպես կարելի է պատմական բարդ տերմիններ և անուններ պարունակող դասը դարձնել հնարավորինս մատչելի, հետաքրքրություն առաջացնել 19-րդ դարի 2-րդ կեսի ազատագրական պայքարի կարկառուն ներկայացուցիչների հանդեպ:

### **Հետազոտության խնդիրները.**

- Բացահայտել «Հայդուկային շարժում» թամայի ուսուցման արդյունավետ պայմանները:
- Ուսումնասիրել պատմական բարդ տերմիններ և անուններ պարունակող դասերի առանձնահատկությունները:
- Սովորողին հնարավորություն տալ ստեղծագործելու, սեփական մտքերն անկաշկանդ արտահայտելու:
- Ապահովել ներառականությունը:

## «Հայդուկային շարժում» թեմայի ուսուցման կարևորությունը

*Քո ցավն, Հայրենիք, կրակե շապիկ է.  
հազնում եմ վառում է, հանում եմ մեռնում եմ...*

### Վարդգես Պետրոսյան

Հայդուկային շարժումը թեմայի շրջանակներում սովորողները ծանոթանում են 19-րդ դարի անհատական- պարտիզանական, վրեժխնդրական պայքարի կարկառուն ներկայացուցիչների հետ: Մարդկանց, ովքեր տեսնելով մեծ տերությունների անտարբեր վերաբերմունքն արևմտահայերի ծանր դրության հանդեպ, փորձեցին արդարությունն իրենց ձեռքը վերցնել ու պայքարել՝ տալով սեփական երդումն ու Հայաստանի ազատագրության խնդիրն իրենց պատվի հարցը դարձնելով:

Քանի որ մեր օրերում էլ ունենք անկախությունը պահելու խնդիր, շատ կարևոր է օգնել սովորողներին կազմել սեփական բազմատեսանկյուն վերլուծական պատկերացումը 19-րդ դարում Օսմանյան կայսրության կազմում ապրած հայերի ու նրանց ազատագրական պայքարի վերաբերյալ, կապեր գտնել հայ ժողովրդի՝ անցյալում և մեր օրերում ունեցած սխրանքների, կատարած սխալների վերաբերյալ:

Ըստ պետական չափորոշչային պահանջների 8-րդ դասարանի «Հայոց պատմություն» առարկայի «Հայդուկային շարժումը» դասի շրջանակներում սովորողը պետք է իմանա Հայաստանի ազատագրության և պետության վերականգնման նպատակով իրականացված ձեռնարկների, ակնառու գործիչների վերաբերյալ, գնահատի դրանց տեղն ու դերը Հայոց պատմության մեջ, ընթռնի և արժևորի տվյալ ժամանակաշրջանի և ներկայիս Հայաստանի միջև եղած բազմատեսակ կապերը, զարգացնի վերլուծական, քննադատական, ստեղծագործական մտածողությունը: Ճանաչի ակնառու պատմական գործիչներին, համեմատի նրանց, գնահատի նրանց գործունեության առանցքային դրվագները: [5; 51]

Չափորոշչային պահանջները շատ են, բայց դրանց կարելի է հասնել ուսուցչի և սովորողի ճիշտ համագործակցության արդյունքում:

«Կան հավերժական թեմաներ, որոնք ընդհանուր են բոլոր ժողովուրդների համար՝ կարոտ, սեր, բնություն, հայրենասիրություն... Սակայն, սրանցից բացի, յուրաքանչյուր

ժողովուրդ ունի իր հավերժական թեմաները: Իտալացին միշտ գրել և գրում է Գարիբալդիի մասին, ֆրանսիացին՝ ժաննա դ'Արկի և այլն: Մեզ՝ հայերիս համար այդպիսի հավերժական թեմա է Անդրանիկը: Անդրանիկը՝ ոչ միայն որպես անհատ, որպես հայդուկ, որպես զորավար, այլև որպես համազգային ընդվզումի, ազատագրական շարժումների խորհրդանիշ, որպես խտացում և հավաքական կերպար Արաբոյի, Աղբյուր Սերոբի, Գևորգ Չաուշի, Սպաղանաց Մակարի, Մուրադի, Սեպուհի և մյուս-մյուս «կրակե շապիկ» հազաճների»: [1;10]

Մեկ դասաժամի ընթացքում ըստ ամենայնի անդրադառնալ վերը թվարկված բոլոր անուններին ու ներկայացնել յուրաքանչյուրի գործունեությունը շատ դժվար է:

*«Ամենափառանդավոր գրողը մի վեպով հազիվ թե սպառի մեն մի ֆիդայու կյանքը»*  
[3;46]:

Կրկնակի դժվար և ձանձրալի կլինի սովորողի համար, եթե դասի ընթացքում ուղղակի ավանդական մեթոդով դասահարցում իրականացվի, նրան մտածելու, վերլուծելու, եզրահանգումներ անելու հնարավորություն չտրվի: Արդյունքում երեխան կսկսի չլսել, այլ զբաղմունք գտնել, չկենտրոնացնել ուշադրությունը: Ուսուցչը ու սովորողը պետք է շփվեն դասի ժամանակ: Այսինքն՝ սովորողները լինեն ոչ թե պասիվ ունկնդիրների դերում, այլ՝ ակտիվ մասնակիցների: [4]

Այս ամենն ապահովող դասի մի օրինակ է առաջարկվում ստորև: Ներկայացված դասը լի է տարբեր մեթոդներով, ինչը մասնակցային է դարձնում այն: Այսինքն՝ տարբեր հմտություններ և ունակություններ ունեցող սովորողները կարող են ներգրավված լինել ուսումնական գործընթացում: Միևնույն ժամանակ հնարավոր է իրականացնել պետական առարկայական չափորոշչով նախատեսված կետերը:

## **Դաշտենցի «Ռանչպարների կանչը» «Հայդուկային շարժումը» թեման ուսումնասիրելիս**

Էս. Դաշտենցի «Ռանչպարների կանչը» հայ գրականության ամենահավաքական պատմավեպերից է, ամենաոգեղենը, ամենահերոսականներից մեկը: Այն հասարակ ռամիկի ծանր կյանքն ու դժվարությունները, ամենօրյա պայքարը ներկայացնող, բայց միևնույն ժամանակ գրական պաթոսից զերծ գործ է: Իզուր չէ, որ 19-րդ դարի 60-ականների սերնդի մասին պատմող այս վիպասքը նաև 20-րդ դարի 90-ականների Արցախյան պատերազմի շատ ու շատ զոհված զինվորների ուսապարկերից են գտել:

Անդրանիկը, Արաբոն, Մախլուտոն, Չավուշը, Սերոբը. ո՞վ էր նրանցից ամենագլխավոր հերոսն այս գրքում: Գուցե Ֆադեն կամ Կարո՞ն, Մելքոն վարժապետը կամ նրա աշակերտ Մամիկո՞նը: Ինձ թվում է, այն յուրաքանչյուր ռանչպարի մասին է, ով պայքարում էր հայրենի երկնքի տակ իր մի կուտ ցորենը կամ գարին մշակելու համար:

Արդյո՞ք հայ ռանչպարի կանչը փոխվել է, թե՞ այն դեռ վերը նշված ցորենը հայրենի երկնքի տակ մշակելու մասին է: Կամ ո՞վ է այդ կանչի հասցեատերը:

«Հայդուկային շարժումը» դասն ուսումնասիրելուց և այս վիպակին ծանոթանալուց հետո սովորողն ինքը կարող է պատասխաններ գտնել այդ հարցերի համար, ապրումակցել հայ-թուրքական, հայ-ադրբեջանական սահմանին ապրող գյուղացուն:

Ստորև ներկայացնենք «Հայդուկային շարժումը» դասի պլանավորման օրինակ:



## **«Հայդուկային շարժումը» թեմայով դասի պլանավորման օրինակ**

**Դասարանը** — 8-րդ

**Առարկան** — Հայոց պատմություն

**Դասի թեման** — «Հայդուկային շարժում»

**Հիմնական հարցերը.**

- Հիմնականում ո՞ր գործոններն էին պայմանավորում հայդուկային շարժումը:
- Ի՞նչ կարող էք եզրակացնել 19-րդ դարի ազատագրական պայքարն ուսումնասիրելով:

**Դասի նպատակը, վերջնարդյունքը.**

- Կճանաչեն 19-րդ դարի 2-րդ կեսի հայդուկային պայքարի ակնառու գործիչներին:
- Կներկայացնեն հայդուկային պայքարի նշանավոր գործիչների մարտավարությունը:
- Կմեկնաբանեն հայդուկային պայքարի կարևորությունը:
- Կվերհանեն հայդուկային պայքարի դրական և բացասական կողմերը:

**Դասի խնդիրները**

**ա. Կրթական(ակադեմիական)**

- Պատմական կարևոր տերմիններն իմանալով՝ դրանք օգտագործել ըստ անհրաժեշտության,
- Անհրաժեշտ տեղեկություններ հավաքել տարբեր աղբյուրներից,
- Արտահայտել սեփական կարծիքն ու դիրքորոշումը,
- Աղբյուրներն օգտագործելիս կատարել հղումներ,
- Վերլուծել, վերհանել պատճառները, հետևանքները

**բ. Դաստիարակչական**

- Արժևորել հայդուկային շարժման դերը հայ ազատագրական պայքարում,
- Արժևորել միասնական լինելու կարևորությունը՝ ազատության և անկախության ճանապարհին

**գ. Զարգացման**

- մտածողություն

Վերլուծելու, սեփական կարծիքն արտահայտելու, ցանկացած հարցին քննադատաբար մոտենալու կարողություն

- երևակայություն

Նկարել, առաջ քաշել ծրագրեր, ստեղծագործել

- կամք, կամային որակներ

Նպատակասլացություն

- զգացումներ, հույզեր, ապրումներ

Հպարտություն, վիրավորանք, զայրույթ

### **Ուսուցման միջոցները (ուսումնադիտողական պարագաներ)**

Ց-րդ դասարանի հայոց պատմության դասագիրքը, տետր, գրիչ, թերթեր, կերպարային քրտեր, սահիկ, հայդուկապետերի նկարները

### **Ներառարկայական և միջառարկայական կապեր**

- Համաշխարհային պատմություն - միջազգային հարաբերություններ, հայկական հարց
- Աշխարհագրություն – աշխատանք քարտեզների հետ
- Հասարակագիտություն - ոտնահարված իրավունքներ
- Հայոց լեզու – բանավոր և գրավոր ճիշտ և փաստարկված խոսք, տեքստերի վերլուծում և ընկալում, հիմնական գաղափարի ըմբռնում
- Գրականություն – Խաչիկ Դաշտենց, «Ռանչպարների կանչը»
- Երաժշտություն- ազգագրական երգ
- ՆԶՊ - զենքեր, ռազմարվեստ, մարտավարություն

### **Դասատիպեր- խառը**

### **Ուսուցման մեթոդներ, հնարներ**

Տեքստային աշխատանք, այլանս /այլ կերպ/, գործնական աշխատանք կերպարային քարտերի միջոցով,

### **Դասի փուլերը և ընթացքը**

**ա.**Կազմակերպչական աշխատանքներ

- Սովորողների հաշվառում

- Դասարանի՝ աշխատանքային վիճակի բերում, աշխատատեղերի նախապատրաստում

Դասամիջոցին կատարել նախապատրաստական աշխատանք: Միացնել սահիկը, ապահովել երաժշտություն:

Նախապես սեղաններն այնպես դասավորել, որ գործնական աշխատանքի ժամանակ ունենանք աշակերտների քանակին համապատասխան խմբեր:

**բ.Անցում նոր նյութի ուսումնասիրման**

Դասն սկսել «Հայ ֆիդայիներ» հայրենասիրական երգը լսելով:

Բուք ու բորան, մութ գիշերին  
Պտտում էր ֆիդային,  
Փամփուշտները խաչկապ կցած,  
Հրացաններն ուսերին:

Ա՛խ ֆիդայիներ, ջա՛ն ֆիդայիներ,  
Ձեր մայրերը՝ ձե՛զ մատաղ,  
Մշոյ Սուրբ տան Սուրբ Կարապետ  
Ձեզի լինի՛ օգնական:

Դուք վախեցրի՛ք, թուրքն անօրէն  
Քշի՛ք մեր սար ու ձորէն,  
Չար թշնամու ա՛չք վախեցաւ՝  
Ջան ֆիդայու գնդակէն.....

**Նոր նյութը ներկայացնելուց առաջ կատարել խթանիչ վարժություն:**

Ուսուցիչը բաժանում է Խաչիկ Դաշտենցի «Ռանչպարների կանչը» վիպակից մի հատված և հրահանգում զույգերով ուսումնասիրել ու իրենց կարծիքը հայտնել առաջադրված հարցերի վերաբերյալ:

**Հատված՝**

Օսմանցիներն մի օրենք ունեին. եթե մեկը տասը տարի օգտագործում էր մի արոտավայր, այդ արոտավայրը կամ կալվածքը այլևս դառնում էր նրա սեփականությունը: Այսպիսով, վերոհիշյալ գավառակներում, լեռնցի հայերի բոլոր արոտավայրերը, որտեղ քուրդ աղաները իրենց անասուններն էին արածեցրել, մի քանի ամառվա ընթացքում՝ քրդերի ձեռքն անցան: Այդ գավառակները ոչ միայն խլվեցին իրենց տերերից, այլև հայ գյուղացիները խաֆիր (ճորտ) դարձան այդ հողերի վրա: Նրանք պարտավոր էին շաբաթվա մեջ մի քանի օր ձրի աշխատել քուրդ աղայի համար և նրան խաֆիրության տուրք վճարել: Մինչև անգամ քուրդ աղաները իրենց ճորտ հայերին կամ հայերով բնակեցված գյուղերը սկսեցին ծախել կամ նվիրել միմյանց՝ իբրև ինչք կամ ստացվածք:

### **Հարցեր՝**

- Օսմանյան իշխանության նման քաղաքականությունն ի՞նչ վերաբերմունքի կարժանանար ճորտացած հայ բնակչության կողմից:
- Քուրդ աղաների ճորտերը դարձած հայերն ի՞նչ քայլեր կձեռնարկեին կորցրած իրավունքները վերականգնելու համար:

### **Նոր նյութի ներկայացում**

- նոր նյութի բովանդակության ամբողջական պատկերի ստեղծում

Սահիկ, պաստառ

- նոր ուսումնական նյութի ընթերցում

Պատմում, հաղորդում

- աշխատանք դասագրքի տեքստի և այլ ուսումնական նյութերի վրա

Տեքստային աշխատանք,

- նոր նյութի ըմբռնում և գիտակցում (նյութի մեջ օբյեկտիվ կապերի և հարաբերությունների հայտնաբերում)

«Ռանչպարների կանչը» վիպասքի նշված հատվածի վերաբերյալ առաջադրված հարցերի մասին սովորողների պատասխանները լսելուց և վերլուծելուց հետո ուսուցիչը նշում է, որ դասի ընթացքում խոսելու են ժողովրդին համախմբել ու կորցրած իրավունքները վերականգնել փորձած մարդկանց մասին, ում ավելի հաճախ ֆիդայի կամ հայդուկ են անվանում: Միացնում է դասը ներկայացնող տեսասահիկը, գրատախտակին գրում նոր տերմիններն ու բառերը, սկսում ներկայացնել նյութը՝

գուգահեռ բացատրելով գրատախտակին գրված բառերը, անձնանունները, տեղանունները.

ա/ հայդուկ,  
բ/ ֆիդայի,  
գ/ չելլո,  
դ/ Կոռթեր,  
ե/Աղբյուր Սերոբ,  
զ/Ներմրութի ասլան/ հսկա,  
է/Սոխորդ,  
ը/Սոսե,  
թ/Գելիեգուզան/ Ընկուզածոր/,  
ժ/Անդրանիկ,  
ի/Շապին Կարահիսար,  
լ/Գևորգ Չավուշ,  
խ/Սուլուխ,  
ծ/Հրայր Դժոխք

### **Նոր նյութի ընկալում և ըմբռնում**

#### **Ընկալման ստուգում**

Այս փուլում ուսուցիչը ստուգում է սովորողների ձեռք բերած ակադեմիական գիտելիքները՝ կիրառելով «Այլանս» (Այլ կերպ) խաղ-մեթոդը:

Ուսուցիչը նախօրոք գունավոր թղթերի վրա գրում է վերը թվարկված նոր անունները, բառերը, լցնում արկղիկի մեջ: Աշակերտներից մեկը գալիս, վերցնում է արկղիկի թղթերից մեկը, կարդում բառն ու փորձում բացատրել դասընկերներին՝ չօգտագործելով նշված բառի արմատը: Այն աշակերտը, ով առաջինն է գուշակում, բացատրում է հաջորդ բառը:

Վարժությունը հրաշալի միջոց է սովորողների ուշադրությունը կենտրոնացված պահելու համար, քանի որ ուսուցչի խոսքը լսած չլինելու պարագայում նրանք չեն կարող ոչ բացատրել, ոչ էլ գուշակել բառերը:

## **Գործնական աշխատանք**

**Կերպարային քարտեր՝** Աղբյուր Սերոբ, Հրայր Դժոխք, Անդրանիկ, Գևորգ Չավուշ

Կերպարային քարտը տվյալ իրադարձության կերպարների մտադրությունները, հույզերը, ապրումները, գործողությունները ներկայացնելու հրաշալի միջոց է և խթանում է պատմական մտածողությունը:

- Ուսուցիչը նախօրոք պատրաստում է կերպարային քարտեր: Այսինքն՝ քարտեր, որոնց վրա պատկերված են քննարկվող իրադարձության կամ ժամանակաշրջանի հետ կապված կարևոր կերպարներ: Տվյալ դեպքում հայդուկային պայքարի նշանավոր դեմքերը:
- Ձևավորում է խմբերը, ապա քարտերը վիճակահանությամբ բաժանում է սովորողներին:
- Հրահանգում է, որ սովորողները վերլուծեն տվյալ կերպարը և մեկնաբանեն, թե ինչ զգացողություններ, մտադրություններ, շահեր, պատկերացումներ կարող էր ունենալ նա նկարի հետևում գրված իրավիճակի պարագայում [2;39-40]

Կերպարային քարտերը՝

1. Արաբո- Արաբոյի ջոկատն ընկավ շրջափակման մեջ և նա իր 16 հայդուկների հետ հերոսաբար զոհվեց




(Նկար 1)

2. Աղբյուր Սերոբ- Ժողովուրդը Սերոբին տվել էր Աղբյուր՝ կյանք տվող պատվանունը:



(Նկար 2)

3. Գևորգ Չավուշ- Գևորգ Չավուշն Անդրանիկի հետ վրեժխնդիր է լինում առաջնորդ Աղբյուր Սերոբին սպանած քուրդ ցեղապետ Բշարե Խալիլից:



(Նկար 3)

4. Հրայր Դժոխք- Հրայրն անհեռանկար էր համարում հայդուկային պայքարը: Առաջարկում էր հրաժարվել անհատական վրիժառությունից և հանգիստ նախապատրաստվել համընդհանուր ապստամբության:



(Նկար 4)

5. Անդրանիկ Օզանյան- Ամենայն հայոց զորավար



(Նկար 5)

- Կազմակերպել կերպարների միջոցով տվյալ ժամանակաշրջանի քննարկում:

### **Ինքնուրույն աշխատանք**

- Տեսրերում գրել մերօրյա ազատամարտիկների և հայդուկների միջև նմանություններ և տարբերություններ:

### **Ամփոփում**

*Պատասխանել տրված հարցին՝*

- Ո՞ր հայդուկին կուզեիր նմանվել: Ինչո՞ւ:



## Եզրակացություն

Ց-րդ դասարանում «Հայոց պատություն» առարկայի շրջանակներում ուսումնասիրվող «Հայդուկային շարժումը» թեմայի ուսուցման առանձնահատկություններն ուսումնասիրելով եկանք հետևյալ եզրակացություններին.

1. Անհրաժեշտ է ուսումնասիրել թիրախային խումբը, որի հետ պետք է տարվի աշխատանքը:
2. Հնարներ օգտագործել, տարբեր հետաքրքիր ու ինտերակտիվ մեթոդներով (այլանս(այլ կերպ), կերպարային քարտեր, տեքստային տարբեր աշխատանքներ և այլն) մատչելի դարձնել դժվար տերմիններ, անձնանուններ ու տեղանուններ պարունակող դասերը:
3. Առաջադրանքներն ու հարցադրումները կազմել սովորողների տարիքային առանձնահատկություններին համապատասխան:
4. Կարևորելով աշակերտակենտրոն ուսուցման մոտեցումը՝ հնարավորություն ստեղծել, որ դասի բոլոր մասնակիցներն արտահայտեն իրենց կարծիքը:
5. Սովորողներին դարձնել դասի ակտիվ մասնակից:
6. Սովորողների համար առաջադրանքները և հրահանգները կազմել այնպես, որ հասանելի լինեն բոլորին, այդ թվում ԿԱՊԿՈՒ սովորողներին:

## Օգտագործված գրականության ցանկ

1. Դաշտենց Խ., «Ռանչպարների կանչը», Երևան, 2022 թ., 536 էջ:
2. Գիրք պատմության ուսուցման. Ինչո՞ւ, ինչպե՞ս, «Պարադիգմա» կրթական հիմնադրամ, Երևան, 2020 թ., 296 էջ:
3. «Գարուն» ամսագիր, 1988 թ., թիվ 8
4. Վիքիպեդիա, Ուսուցման ակտիվ մեթոդներ  
[https://hy.wikipedia.org/wiki/%D5%88%D6%82%D5%BD%D5%B8%D6%82%D6%81%D5%B4%D5%A1%D5%B6\\_%D5%A1%D5%AF%D5%BF%D5%AB%D5%BE\\_%D5%B4%D5%A5%D5%A9%D5%B8%D5%A4%D5%B6%D5%A5%D6%80](https://hy.wikipedia.org/wiki/%D5%88%D6%82%D5%BD%D5%B8%D6%82%D6%81%D5%B4%D5%A1%D5%B6_%D5%A1%D5%AF%D5%BF%D5%AB%D5%BE_%D5%B4%D5%A5%D5%A9%D5%B8%D5%A4%D5%B6%D5%A5%D6%80)
5. Հանրակրթության պետական առարկայական չափորոշիչներ  
<https://escs.am/files/files/2020-07-17/a266911a693f809df0b4aa3175b0bcdb.pdf>